

*LE CHAPITRE DES CLOSTVRES,  
contenant dix-huict versets, escrit  
à la Medine.*

*Ekeri intitule ce Chapitre le Chapitre des Mu-  
railles.*

**A**V nom de Dieu, clement & misericordieux. O vous qui croyez, ne preferez pas ce que vous faites à ce que Dieu & son Prophete ont fait, & craignez Dieu, il entend tout ce que vous dites, & void tout ce que vous faites. O vous qui croyez, lors que vous parlerez au Prophete, ne parlez pas plus hault queluy, ne criez pas commelors que vous parlez entre vous, autrement vous rendrez vos bonnes ceuvres vaines & inutiles & ne le cognoistrez pas; Dieu a esprouvé la vertu de ceux qui parlent bas en la presence du Prophete, il leur pardonnera leurs pechez, & leur donnera vne tres-grande recompense. Ceux qui t'appellent par derriere les Clostures, ne sçauent pas ce qu'ils font, s'ils eussent attendu que tu eusse esté verseux, ils auroient tres-bien fait, Dieu est clement & misericordieux. O vous qui croyez, si quelque infidelle vous veut prescher, distinguez la verité d'avec le mensonge, si vous croyez les ignorans vous vous en repentirez; Sçachez que l'Apostre de Dieu

est entre vous, vous offenserez Dieu si vous obeissez aux infidelles en plusieurs choses, Dieu veut que vous embrassiez sa loy, elle resiouira vos cœurs, & vous fera abhorrer la desobeissance & l'impieté, ceux qui l'abhorrent sont fermes en leur foy par la grace speciale, il les, cognoit, & est tres-sage. Si deux nations ou deux Prouinces de ceux qui croyent en Dieu s'entrebattent, mettez la paix entr'eux, si l'un fait tort à l'autre, combattez celuy qui est iniuste iusques à ce qu'il ait satisfait à ce que Dieu a ordonné, s'il y satisfait accordez-les avec equité, soyez iustes, Dieu aime ceux qui rendent bonne iustice à son peuple; tous ceux qui croyent en sa loy sont freres, mettez la paix entre vos freres, & craignez Dieu, il vous donnera sa misericorde. O vous qui croyez, ne vous moquez pas de vostre prochain, peut-estre qu'il vaudra vn iour mieux que vous. O femmes, ne vous mocquez pas des autres, peut-estre qu'elles vaudront vn iour plus que vous; Ne vous dites point d'iniures, & ne donnez point de nom à vostre prochain qui luy deplaise, appelez-le par son nom, autrement vous desobeirez à Dieu, ceux qui ne se conuertissent pas ont tres-grand tort. O vous qui croyez en Dieu, gardez-vous de mauuaises pensées, elles sont souuent au nombre des pechez, ne faites point de deplaisir à vostre prochain, & ne vous dites rien les vns aux autres qui vous puisse deplaire; Quelqu'un d'entre vous voudroit-il manger la chair de son frere mort? vous l'abhorreriez, craignez donc Dieu il est clement &

misericordieux à ceux qui ont la crainte deuant les  
 yeux. O peuple, nous vous auons crée male & fe-  
 melle, Nous auons fait sortir de vostre lignée des peu-  
 ples & des nations, vous vous cognoissez les vns les  
 autres, mais vostre plus grand honneur est de crain-  
 dre Dieu, il vous cognoist & sçait tous vos secrets.  
 Quelques vns d'entre les Arabes ont dit, Nous  
 croyons; Dis leur, ne dites pas nous croyons, dites,  
 nous sommes obeissans, autrement la foy n'entrera  
 pas dans vos cœurs, si vous obeissez à Dieu & à son  
 Prophete, vous serez recompensez de vos bonnes  
 ceures, Dieu est clement & misericordieux à ceux  
 qui obeissent à ses commandemens. Ceux qui sont  
 aymez de Dieu, croient en son vnitè & en son Pro-  
 phete, ils ne doutent pas de sa loy, & employent leurs  
 personnes & leurs biens pour la propagation de la  
 foy. Dis leur, Ne cognoissez-vous pas que vostre  
 loy procede de Dieu? il sçait tout ce qui est dans les  
 Cieux & dans la Terre, il sçait tout. Ils croient te fai-  
 re plaisir de se sauuer: Dis leur, ne croyez pas de me  
 faire plaisir; au contraire, c'est Dieu qui vous fait  
 grace de vous conduire au chemin de salut, vous le  
 devez ainsi croire, Dieu sçait tout ce qui est aux  
 Cieux & en la Terre, & void tout ce que vous faites.